

ВЫДАВНИЦТВО ТОВАРИСТВА „ПРОСВѢТЫ“  
В УЖГОРОДѢ

∴ Ч. 21. ∴

# СТАРОРУСЬКѢ ОПОВѢДАНЯ.

ЛИЦАРЬ И СМЕРТЬ  
И ДРУГѢ ЛЕГЕНДЫ.




1922.  
КНИГОПЕЧАТНЯ „ВИКТОРІЯ“ В УЖГОРОДѢ.



EX  
LIB  
RIS



PAUL R. MAGOCSI





# СТАРОРУСЬКѢ ОПОВѢДАНЯ.

398  
C-77

ЛИЦАРЬ И СМЕРТЬ  
И ДРУГѢ ЛЕГЕНДЫ.



о. MICHAEL M. BENDAS.  
kál. v. jaščennik  
STANOV. p. Beregleđnyj alva

*Михайло М. Бендас*  
20. X. 1947



Серед нашоѣ старшоѣ руськоѣ письменности находиме цимало оповѣданъ, котрѣ мають своѣй початок в дуже далекоѣй давнинѣ, еще у XI. и XII. вѣцѣ, коли то у нас почала розвиватися литература.

Наши карпатскѣ горы много укрыли такоѣ письменности, яка на київськѣй Руси уже давно щезла. До таких памяток належать и оповѣданя, котрѣ подаємо в нашоѣй книжочцѣ. Сѣ оповиданя ширилися у нас головно в XVII и XVIII вѣцѣ, их брали часто до проповѣдей наши давнѣ священники, бо они мѣстять в собѣ багато поучного.

Народ их любив слухати и читати, тому их радо переписовали в окремѣ книжочки або зборники. Наши оповѣданя — котрѣ инакше назвати можно легендами — взятѣ из одноѣ такоѣ староѣ книжочки.

Они як видно мають дуже багато зерна правды и возбужують наши душѣ на лѣпшѣ дѣла. Язык тых оповѣданъ народнѣй, як бы нынѣшнѣй, а стиль нагадує евангельскѣ притчы. Мы оставили все так як в старых книжках было, змѣнюючи лиш рѣдко дакотри слова, для лѣпшого порозумѣня.

Легенды сѣ перепечатав еще в 1897. роцѣ Володимир Гнатюк в Записках наукового товариства им. Шевченка у Львовѣ т. XVI. из старого зборника подкарпатско-руського походження. Кто бы хотѣв видѣти их у первѣстнѣм видѣ, най там загляне.

А тогѣ, котрѣ не вѣрять, як красно писали нашим народним языком еще в XVII. и XVIII. вѣках наши праѣды най придивлятыя тым оповѣданям ближе, а може дечому доброму научаться.



# 1.

**Казка о однѣм славнѣм лицарѣ, котрый надѣявся на свою силу и пробував щастя воювати из кождым, а на останок из смертію.**

В земли грецкѣй був один славный лицарь, на имя Севиан, котрый був дуже мощный и препышный, а в лицарствѣ потужный. И одного разу справивши бенкет дуже пристойный и гойный з розкошами дуже великими, запросив приятелей, сенаторѣв и панѣв великоможных.

Сѣвши за стѣл при обѣдѣ, сказав тѣ слова:

Мои милѣ приятелѣ и сенаторы! Ци есть мощнѣйшій хто и сильнѣйшій, бѣльше лицарскій на сѣм свѣтѣ, як я?

На то сказав молодой сенатор: — Не есть, вельможный пане, такого на сѣм свѣтѣ потужного, мощного и лицарского, як ваша вельможность.

Тогды встав один старець и сказав: — Вельможный, милостивый пане и лицарю славный! Есть смерть мощнѣйша и славнѣйша от всего свѣта, бо она забирае королѣе, царѣв, славных лицарѣв и войнѣв хоробрых.

Он зараз его высварив и сказав собѣ коня сѣдлати. И узявши з собою одного хлопця и всю лицарску зброю, поѣхав в поле. И мовить тѣ слова: — Пѣйду я шукати тоѣ смерти, ачей бы она и зо мною ся побила.

И ту божим повелѣніем явила ся ему смерть видимо на полѣ страшна, як нѣхто: сама з костей, голѣната, сабага, головата, кострубата, вытрѣсковата, зубата. А носить из собою все свое орудіе: кривую, острую косу, довгій меч, пилу, серп, рыскаль и мѣтлу.

Видѣвши то лицарь, скочив до неѣ конем; а кѣнь избоявся, изфукав и не смѣв ид ней пѣйти. Видѣвши то лицарь, сказав до неѣ: — Хто ты є и що за чудо такое показалося менѣ на тѣм дикѣм полю пустѣм?



Смерть ему каже: — Я есмь смерть, котроѣ ты кличеш и шукаеш. Если тобѣ мене потрѣбно, я прийшла до тебе и хочу тя узяти пышнаго пана.

На того одповѣвъ ѣй лицарь: — Та ци то ты, красная смерте? Тась ми краса того свѣта!

Каже ему смерть: — Ты мене видиш некрасную, але я красных из того свѣта побираю: святителѣвъ, королѣвъ, царѣвъ, княжат, гетманѣвъ, лицарѣвъ, потужных воинѣвъ, витязѣвъ сильных, патріярхѣвъ, митрополитѣвъ, владык, архимандритѣвъ, игуменѣвъ, черцѣвъ, пустинникѣвъ, попѣвъ, казнодѣѣвъ, философѣвъ, красномовцѣвъ, риторѣвъ; сильных, мощных, богатых, убогих; сироты и удовицѣвъ; слѣпых, хромых, старых, молодых и малых дѣтей. Всѣх я тых зарѣвно беру.

Почувши то лицарь, сказав до неѣ сердито: — Слухай ты смерте не хоснавая! Если ты тых побираеш и тебе ся боять, а мене ты не возьмеш и тебе ся не бою такоѣ поганоѣ, плюгавоѣ, огидноѣ. Есть у мене на тебе булатный меч, огнистая стрѣла и срѣльба (пушка), дробнѣ стрѣлы и остре копіе.

Смерть ему каже: — Слухай ты чоловѣче! Ты ся хвалиш своею зброєю, а у мене есть на тебе моя зброя: кривая коса, острый меч, зубата пила, кривый серп, рыскаль, мотыка и мѣтла. Косою подѣтну тобѣ ноги, пилою ти перетру кости, серпом перерѣжу ти горло, мечем ти одсѣкну руки рыскалем ты одотну голову, мѣтлою ти замету кров.

Каже ѣй лицарь: — О смерте нехоснава, головата, кострубата, зубата, вытрѣсковата, суха, блѣда, сабата, голѣната, страшное чудо! Та ци годна ты зо мною битися своим непристойным орудіем? Коси ты своею косою по пустѣм полю траву; три ты своею пилою гнилое колодя; жни ты своим серпом жаливу (кропиву); сѣчи ты своим мечем хащу; копай ты своим рыскалем глину; замѣтай ты своею мѣтлою на дорожѣ порохи. У мене есть на тебе меч мой острый, огнистая стрѣльба. Не таких я сильных и хоробрых лицарѣвъ и сильных витязей на войнѣ звитязав и витязій военных и герцѣвникѣвъ своею зброєю, копіем и силою побивав. Та бым теперь тебе чуда не мѣг побити? Уже ты бѣльше не будеш людей побивати и побирати. Уже тут твои тотѣ сабатѣ голенѣ по тѣм полю будутся валяти и тѣй твоѣй костяный тулоб буде пожар палити.



Каже ему смерть: — Небоже лицарю! що ты ся хвалиш, иж ты на войнѣ много побивав? И кѣлько у войнѣ голов гине, то без мене и там не есть.

Почувати то лицарь каже: — О смерти злая! То знати, що лжеш и неправду говоришь. Я многих побивав, а тебе там такого чуда нѣколи не видѣв и ниго ми не повѣдав нѣчого и не помагав ми. Стань ты теперь до бою зо мною, а я готов.

Каже ему смерть: О чоловіче глупый! Не поможе ти лицарская зброя и довге копіє. Не таких я у свои руки побрала, як ты теперь. Послухай, чоловіче, що ти буду повѣдати, почавши от Адама. . .

Рече їй лицарь: — Повѣдай, що маєш повѣдати.

Тут ему смерть каже: Слухай пане! Адама и Еву, праотцѣв ваших до потопа, людей перших, я узяла; по потоцѣ знову Ноя славного и сынов его я узяла; Авраама, Изаака, Якова я побрала; быв один Самсон сильный на всѣм том свѣтѣ, под тым сонцем сильнѣйшого не было, бо он сам так повѣдав: кобы ми, каже, такой мастер, абы ми кѣльце у землю управив, абы ся не вырвало, то бым цѣлым свѣтом так повернув, як жорнами. И того узяла. Царь Давид псалтырь выложив через духа святого, — я и того узяла; Царь Соломон быв премудрый, котрый сорок лѣт и шѣсть святая святых церков будовав и три роки дияволами робив, — я и того узяла; Навходоносор, царь вавилонскій, быв грозный на увесь свѣт: — то я и того узяла; Троян царь, Юліян царь, Максимиліян король, Датіян король, славнѣ были, — я и тых узяла с того свѣта. Нуж який був царь Дарій перскій, царь Пор индискій, которѣ ся богами земными писали, — то я и тых побрала; нуж еще який був царь Александер македонскій, царь над царѣ и всему свѣту господарь був: — я и того узяла; еще, чоловіче, быв ачей такой витязь хоробрый Бова король: — я и того узяла; еще ачей був теж такой витязь, як ты, Бронствик король, котрый був Салвом зайшов под зеленую сторону, — я и того узяла; и многих королѣв, царѣв, гетманѣв, потужных, иных людей, рѣжных вѣр и языков и еретиков, поганных мучителѣв, гонителѣв строгих. А що теперь гадаеш из своим немоцным лицарством? Уже є солнце над западом, день ся вже твоїй коротает, вже тобѣ дома не быти, але ту на том поли зостати. Тѣло твоє и кров твою будутъ потята и



звѣрята ѣсти и кров пити, тѣлько твои кости до дому принесутъ. А ты, хлопя, не бойся, Богъ з тобою!

Почувши то чловѣкъ, злякъся. Одеревѣли ему руки и ноги, его всѣ составы розслабли. Став тихимъ а покѣрнымъ словомъ говорити, кажучи: — О смерти славная и сильная! то силу великую маеш. Твоя бесѣда всю силу мою загубила; але прошу ты покорно, попусти ми мало, нехай на тѣмъ пустѣмъ полю не помру безъ покаянiя и нехай дойду до дому и покаюся грѣхѣвъ моихъ и розпоряджу двѣръ свѣй и челядь, бо емъ не справивъ Богу нѣчого рядного на сѣмъ свѣтѣ живучи.

Каже ему смерть: — О злый чловѣче! Ци не было ти лѣтъ, мѣсяцѣвъ, днѣвъ, годинъ и часу, коли ты розкошовавъ в гордости своѣй и в бучности пивъ, ѣвъ, гайновавъ, а на Бога небесного и на смерть еси ты не памятавъ, из своего скарбу Господу Богу нѣчого не справивъ. Бывъ тобѣ часъ на покаянiя, але вы есте чловѣчки лукавѣ, несправедливѣ; коли вамъ якась бѣда ся стане, або хороба, або якiй припадокъ, то вы Бога святого просите, абы вамъ погодивъ и помѣгъ, а потѣмъ Бога забудете и на смерть не памятаєте, ижъ живете з Богомъ.

Каже лицарь: — О смерти, госпоже, панѣ моя! Маю скарбу досить, золота и сребла, камѣня дорогоцѣнного, перлы кристаловѣ, жемчуги и иншихъ достаткѣвъ много. Прошу ты, панѣ моя, ходи зо мною до моего дому и намери собѣ скарбу досить, кѣлько хочешъ. А менѣ еще потерпи, закимъ ся покаю грѣхѣвъ своихъ.

Каже ему смерть: — Глупый чловѣче! Кобы я скарбы брала, тобы и земля не могла ихъ вымѣстити. Порожня твоя бесѣда.

Каже пан до смерти: — Панѣ моя, еще ти повѣмъ слово, прошу ты до своего дому на гостину любую и утѣшную; нехай ся з тобою навеселю и нехай в дома умру, абы мя присмотрѣли мои любѣ приятелѣ и слуги, абы мя туй звѣрове и потята не зѣли.

Каже ему смерть: — Все то твоя порожняя бесѣда! Не потребую я нѣколи жадноѣ гостины и бенкетѣвъ; тамъ менѣ гостина, де є плачъ, слезы и крикъ по мертвѣмъ, то моя работа и потѣха.

Каже лицарь: — О смерти, панѣ моя! Еще ти повѣмъ одну рѣчь; у тебе нѣтъ мужа, а у мене нѣтъ жоны; поберѣмся!



Ты є сильная, а я також лицарь, мощный и будемо панувати на сѣм свѣтѣ без клопоту.

Тут ся смерть розсмѣяла и каже: — Дурный и безумный чоловічє! що се ты говориш? Кобы я потребовала собѣ мужа, то бы я не такого смердуха прияла; або цѣсаря, або короля, або царя, але нѣколи не потребую собѣ мужа на вѣки. Уже ся, чоловічє, не вымантиш од мене; сонце уже тобѣ потемнѣло, день твоѣй кѣнчить ся.

Тут лицарь зомлѣвши, упав из коня на землю. Став из плачем говорити: — О смерти злая, о смерти глухая, о смерти слѣпая, о смерти немилостивая, о смерти нежалосливая, жовнѣру неупрощеный! То ся не могу у тебе выпросити и умо-лити, але вижу, що ся мушу ту пѣд твою острую косу нахилити. О смерти, смерти! Тось мя такого славного без вѣсти несподѣвано застала и зо всего мя обидрала.

А потѣм уста ся єму замкли и бѣльше уже нѣчо не говорив, и жили єго подеревнѣли. А смерть приступивши, утяла єму голову косою и невидима стала. Видѣвши то хлопецъ, побѣг до палаты єго и розказав злую погибѣль пана своего. Плакав и повѣдав все по ряду, що ся стало из паном.

Почувши то слуги и приятелѣ єго, здумнѣли ся и скочили по тѣло єго. А коли там прийшли, то тѣлько хроборы єго лежали, а тѣло єго звѣрѣ обнесли и потята. И принесли хроборы лицаровѣ и погребли без тѣла. И быв там страх на всѣх, а хлопецъ то усе розповѣдав по доводу, що ся стало и що ся чинило.

И так ся скѣнчив оный пишний и злый лицарь. Пан злый зле погинув и слава єго со шумом погибла.

---



## Повѣсть о одномъ королѣ, котрый ходив со злодѣемъ в ночи красти.

Быв один король дуже добрый, быв до людей. Тому королеви повѣв один мудрецъ: — „Королю наяснѣйшій! Сеѣ ночи, если ты не пѣйдеш красти, то до рана злою смертію погинеш.“

Почувши то король счудовався тому, а потѣм уснув по обѣдѣ. И приснився ему сон: — „Королю наяснѣйшій! Если ты хочеш свое здоровля заховати, иди ты сеѣ ночи красти; а если не пѣйдеш, то злою смертію погинеш.“ Король пробудився, здумѣвся вельми. И мислить сам собѣ: — „Боже милый! що бы то мало быти? Если то так, волю я пѣйти красти, нѣж злою смертію погинути. И не повѣдав то кѣкому, а коли было у твердѣ первосны, зняли короля гадки, не може спати. Потѣм, коли поснули вшитки, уставши король, убравшись по хлопски, тѣльки королѣвскую дорогую шапку узав на себе и выйшов из города потаѣмным выходом. И пѣшов на мѣсто и став ходити по межи крамницѣ, де бы мав що украсти. И ту знайшов чоловѣка. Чоловѣк также увидѣвши чоловѣка, збоявся. А то був также злодѣй. Потѣм король потиху сказав: — „Хто ты е? Що ты за чоловѣк?“ А злодѣй сказав: — „А ты хто е?“ Король сказав: — „Я злодѣй“.

Почувши то злодѣй, рад був вельми, прийшов близше и каже: — „И я есмъ злодѣй. Прошу тя, брате, будѣме собѣ товаришѣ. А король сказав: — „Добре, брате, я товаришови дуже рад.“ И дали собѣ руки и присягли один другого не зрадити, але вѣрно жити. И ходили оба помежи крамницѣ, хотячи якую vybrати. Але были твердо позамыканѣ, не могли ничего достати. Рекъ злодѣй: — „Що маѣме чинити, товаришу. Не збудѣмеса ту нѣчого. Где ся повернеме?“ А король сказав: — „Не знаѣш ты, що? Ходѣм мы до королѣвского замку. Я знаю,



куда вѣйти в замок и знаю один склеп королѣвскій и мы там ся здобудеме добре“. Почувши то злодѣй, вывалить короля по челюсти мощно и каже: — „О злый чоловѣче! що се ты говориш? Абы ты не дочекав живым свѣта! То я его милости королеви, панови своєму, ворогом мав быти, а ђн єсть нам добрый, яко отець! Не дай ми то, Боже!“ А король мовчить. Потѣм злодѣй рече: — „Слухай ты мене, товаришу милый! Я тебе поведу, если ты хочеш. Ходѣм мы до дому королѣвского маршалка. Злый, людей дере и короля не боятся. Там я знаю скарб и там ся здобудеме“. И там пѣшли до дому маршалка и увидѣли, що ся свѣтитъ у покою его. Они прийшли тихо, а было окно высоко. Сказав ему злодѣй: — „Милый товаришу! Стань пѣд стѣну, нехай я стану на твои плечи и выслушаю, що ту за бесѣда“. И так став злодѣй на плечи королеви и стане слухати. А маршалок говорить своѣй жонѣ тыѣ слова: — Зготовати лютую отраву королеви со змѣевым ядом; запрошу короля заранѣ до себе на гостину и насыплю ему у погар тоту трутизну. Он выпивши, умре, а мы будеме над его скарбом паном и его добро поживати.

Выслухавши то злодѣй, злѣз с плечей королевых; став его король пытати: — „Що єси, милый товаришу, выслунав?“ А ђн сказав: — „Злая новина, товаришу! А то заранѣ маршалок хоче короля запросити на гостину и отравитъ его. Так ся намовили из жоною своєю. А я не знаю, як бы то королеви сказати, абы ся стерѣг“. Почувши то король, одотхнув тяжко и сказав: — „Злая вѣсть, товаришу, на короля нашего; треба бы то ему сприяти. Знаю, що мав бы од него велику ласку той чоловѣк. Каже злодѣй: — „Дайме покой, брате, теперъ и розстаймєся. Дайме собѣ знак, якже ся маєме назаранѣ спѣзнати.

А король сказав ему: — „Прийди ты, брате, до костела, хиба ся там спознаєме“. Рече злодѣй: — „Если то так, товаришу милый, дайме собѣ знак. Возьми ты на себе мою шапку, а ты менѣ дай свою; и коли будеме завтра в костелѣ, не знимаєме собѣ из головы шапки, то так ся спознаєме. А в тѣм ся розойшли. Злодѣй пѣшов до дому, а король собѣ пошѣв до палаты и лѣг спати и мыслив собѣ: — „Милый Боже, що то ся хоче надо мною стати од моего



слуги? Подѣбно ми Бог того злодѣя нагодив, хоч мя и по челюсти выпалив; лѣпшій ми той приятель, мѣж мѣй слуга. Коли бы мы его завтра пѣзнати, нагородив бим ему добре за его приязнь.

А коли зазорѣло, зазвонено до костела, стали ся люди и панство збирати, бо была недѣля. Потѣм король убравши ся, пѣшов из панством до костела. Шати на нѣм королѣвскіѣ, дорогіѣ, а шапка цундрава, дуже стара. И чувалося вельми все панство тому, що то ся чинить. И сам маршалок дивується, котрый то хоче короля отравити.

Прийшовши король до костела, сѣв в крѣслѣ високо и смотреть по всѣх людях товариша своего. Потѣм якогось часу не борзо увѣйшов и злодѣй до костела. Став пильно смотрѣти на кѣм бы мѣг свою шапку пѣзнати. Потѣм посмотрѣв на маестат королѣвскій и увидѣв шапку свою на короли. И убоявся и мыслив собѣ: — То конечно хтось пѣдслухав нас в ночи из товаришом моим, що мы бесѣдовали, и удав то королеви; або мѣй товариш сам мене удав. Потѣм король увидѣвши товариша своего и пѣзнав его по своѣй шапцѣ и рад був вельми товаришеви. И пѣслав слуг своих, абы его вартовали пильно. А коли было по службѣ, казав король просити того чоловѣка за собою до палати своеѣ на обѣд. Хлоп ся збояв и мыслив собѣ: — теперь мы гѣркій обѣд. А коли король вѣйшов у палату, казав увести до себе и злодѣя. И были там сами в двох. Сказав ему король: — „Не бѣй ся, товаришу милый! Я днесь королем, а в ночи був ем злодѣй. Я ем твоѣй товариш, котрого ты по лицу ударив. Але я ти тото прашаю. Не бѣй ся, не гадай ничего злого. Ты есть мѣй вѣрный приятель. Одно ты прошу: если то есть правда, що мя мѣй маршалок хоче днесь отравити, будеш од мене великую ласку мати“.

Тут ся ему злодѣй у ноги поклонив и рек: — „О найяснѣйшій королю, пане мѣй. Отпущай твоя милость мою злѣсгь, бо я розумѣв, що тото простый хлоп зо мною ходитъ; а то, пане мѣй, есть правда, що то твоѣй милости зготовлено отрою. Але ся не бѣй, я тебе порядку, як маеш из тым чинити“. — „Потѣм король казав ему дати шаты дорогіѣ и посадив его попри себе в мѣсто гостя и казав ему дати пити. Тут ему рече товариш: — „Королю милый! така есть на тя порада маршалкова и з жоною



его; що коли ты зазове до себе на гостину, дасть тобѣ чашу золотую першую. А буде пильно ты просити из своею панею, абыс ты за их здоровля тую чашу выпив. Але ты королю милый, не слухай их лукавства, хочбы тебе як лестили, але ты его самого пригрози своего злого врага, що тобѣ изготувив, нехай то поживе.“ А коли король сидѣв при столѣ, прийшов маршалок и став короля просити до своего дому на гостину. Вставши король, пошов и узав товариша своего мѣсто гостя. И коли там сѣв король, станув тогды перед королем маршалок со женою своею, почали его вѣншовати розмаитыми словами лестными, яко враги лукавиѣ. А товариш ему сказав по тихо: — „Королю милый! Если хочеш здоровля свое заховати, не слухай их лукавства.“ Потѣм маршалок узавиш золотый погар у руки, поставив перед королем з лютою трутизною, смертельным ядом змѣевым. И поклонивши ся, став его дуже умильно и розмаито просити, абы то за их здоровля и за их любов тую чашу выпив. А король узавиш тоту чашу, поставив еѣ перед маршалка и став говорить, кажучи: — „Мой наймильшій слуго! Дякую ти за такую вашу любов и приязнь противко мнѣ. Але то иначе и не може быти, одно ты мусиш до мене пана своего перше поклонити за доброе здоровля, а я потѣм поклоню до твоеѣ панѣ. Маршалок одповѣв: — „Королю милый! Не належиться менѣ перше од короля з королѣвского погара пити, бо то вашѣй милости насыпано во имя королѣвское.“ А король ему сказав: — „Уже ты на тоє нич не гадай; коли я тобѣ позволяю, мусиш то учинити, а еслибысь не хотѣв, то мой меч, а твое имя.“ Тут ся король на него опалив и розказав слугам своим застати его од дверей, абы не утѣк, а сам каже: — „Уже ты мусиш пити, если ты ми вѣрный слуга, або горло твое утратиш.“ Тут ся маршалок убояв и мыслив сам собѣ: — „Однако уже менѣ живому не быти, хоч пити, хоч не пити“. Узавиш погар в руки з трутиною, став пити не по воли и каже: — „Уживай то сама душе, що еси была пану зготовила“. То сказавши, выпив тоту злую, лютую трутизну, а скоро выпив зараз упав и здох и став ся пукати люто. Выдѣвши то король, похвалив небесного Бога, а жену его казав розволочити кѣньми по полю. И побив враговъ своих, а товариша своего учинив маршалком. Посадив его на всѣм тѣм панствѣ, учинив его першим по



собѣ и шанував его дуже пристойно, як своє здоровля. И жив король в радости великѣй у годности, у щастю, в мирѣ, в добрѣм покою. Доконав живота своего, умер смертію великою, славною, яко король и монарха великій и погребен був с великою честію.

---



## Казка о цѣсарю Йовианѣ, котрый був пѣднѣс пыху проти Бога и котрого Бог покарав.

Быв один цѣсарь грецкій, на имя Йовиан. Быв дуже переможный и потужный и грозный и в достатку гойный и в богатствѣ. Слуги мав дуже препышнѣ и гойнѣ, перепоясанѣ золотыми поясами, пышно, гойно, збройно и у всѣм дуже пристойно. И одного разу лежачи на лѣжку своѣм отой пышный и преможный цѣсарь мыслить сам собѣ кажучи: Хтож ми може противным быти? Маю досить всякого статку, можности, скарбѣв, паньства, достаткѣв, богатства, слуг препышных. Не є менѣ рѣвнѣйшого на земли крѣм Бога. И пѣднесло ся сердце его у пыху велику и гордость. А потѣм казав слугам и паньству своѣму конѣ сѣдлати и поѣхав у поле, на ловы. А коли были у поли, повелѣв Бог мощно печи сонцю горячостію своєю. И стало сонце сильно грѣти и палити цѣсаря. Иншим слугам не было нѣчо, котрѣ при нѣм были, але цѣсареви зле было, зле ся дѣяло и з великоѣ горячости до смерти ему приходило. И видѣв король у поли воду и сказав до слуг своих: — „Станьте вы ту, а я пѣйду купатися, бо ми есть зле; а скупавшися, приѣду к вам, бо як ся не скупаю, то умру.

И поѣхав сам один и приѣхав до воды, злѣз из коня и привязав его до кѣпія, а сам розобраавшися скочив у воду, став ся купати доволно.

И що ся стало над цѣсарем пышным?

Прийшов пак ангел его хранитель, во всѣм ему подобный, як зростом, так позором, лицом, бесѣдою, и узав на себе одѣня царское и всѣвши на коня его, приѣхав до слуг, а слуги паньство поклонили ся ему як цѣсареви и не пѣзнали его, хто есть. И сказав ангел до панѣв: „Не маєме часу на ловы; идѣм до дому“. И поѣхали из поля до дому.



Прийшовши ангел в полату, сѣв яко цѣсарь из цѣсаревою, из панамы, а цѣсаря zostавили на полѣ голого.

У якійсь час накупавшиися цѣсарь Йовиан, вийшов из воды, але не знайшов нѣ шат, нѣ коня; zostав чудом голый на поли. И зляк ся бѣдный и не знав, що чинити. Став ся сердити вельми на слуг, що его лишили и мыслив помстити на них велико и много. Мыслить много, де бы ся дѣти и де пойти, бо встыд е великій. Мусѣв ночи ждати, а коли было пѣздно, став мыслити, куда пойти. И сказав сам собѣ: — „Не учиню инакше, лише поиду до своего старого судѣ; той ми дасть шаты и коня и я прийшовши буду слуги карати горлом“. И вставши, пошов. И прийшовши до мѣста, почав торкати у ворота, абы ему отворили. Увидѣвши его варта, стала пытати, хто есть? А он им сказав: — „Я есмь цѣсарь Йовиан. Повѣжте панови своему, нехай ми дасть сукнѣ и коня, абы пойти в палату, а то ем стратив з пригоды“.

Поидовши слуги повѣли то пану, кажучи: — „Пане наш, ту якійсь хлоп шаленый, голый стоить у воротах и просить твоеѣ милости за сукнѣ и за коня; а каже, що е цѣсарем“.

Почувши то пан, счудовався, що ся дѣе? Цѣсарь наш на столицы, а я теперь недавно од цѣсаря. И повелѣв его пустити перед себе. А коли его привели перед пана, увидѣв его судия и не пѣзнав. Став на него пльовати, кажучи: — „Згинь од нас чорте проклятый, душа нечиста“. Явно еси ся показав, хто ты е? А он ему сказав: — „Що ты ся стало? Ци ты не знаеш мене, що я есмь цѣсарь Йовиан. Дай ми коня и шаты, бо ем стратив з пригоды“. Каже судия: — „Слухай ты, хлопе шаленый! Як ты смѣеш звати ся королем нашим, а наш король на столицы сидит и я теперь от него. Слухай ты, хлопе, як вижу, не зайдеш ты ся, абысь не битый; не зови ты ся королем“. И розказав слугам мощно бити карбачем. А слуги, яко то дворяне, радѣ тому были, били его, як сами хотѣли; аж до крови били его и вытрутили за ворота. Там пышный цѣсарь лежачи, плаче от такоѣ ганьбы своеѣ. И мыслить собѣ, що мае чинити и где ся мае дѣти? А потом умыслив собѣ: есть у мене еще единый князь, котрого ем учинив князем и у котрого я ся кохаю; если мя той познасть и дасть менѣ сукнѣ и коня дойти на столицю. Але тут слуг моих — скоро прииду — кажу постинати, що мя лишили у поли на бѣду; и судию того



из паньства извержу и слуги его, котрѣ мя били, кажу их почетвертовати.

И вставши пошов до другого мѣста, до своего коханого княжати, а сам весь кровю изплыв. Прийшовши до брамы\*), почав толкати, абы отворено ему было. Сторожа, почувши, пытали его: хто ты є и чого в ночи ходишь? Йовиан сказав: — „Пустѣть мя, я єсм Йовиан, цѣсарь, йду до княжати своего коханого.“ Сторожа, увидѣвши его всего кровавого, сказала: — „Ты не є чоловѣк, але ты є шатан.“ Побѣгли, повѣли то княжати, кажучи: — „Пане вельможный, якійсь чоловѣк стоить у брамах, проситьсѣ, абысмы пустили его до тебе. И каже, що є цѣсарем, але є голый и весь у крови.“ Почувши то князь, казав его пустиги и дознати, що то єсть такого. А коли его пустили, скоро его увели у свѣтлицю, а князь видѣвши его зляк ся; став на него плювати и заклинати, кажучи: — „Изгинь шатане, душа нечиста.“ А цѣсарь сказав: — „Не єсм я дух нечистый. Я єсм цѣсарь ваш Йовиан, котрый єм тя учинив княжатею и в тобѣ ся кохаю. Дай ми коня и сукнѣ дойти до дому, палаты моеѣ, а то єм стратив все из пригоды.“ Почувши то князь, каже: — „Не дарьмо, як вижу, тебе бито, хлопе шаленый, бо ты якійсь пѣниця одежу єсь из тебе пропив, а другое в карты програв, а до мене ты прийшов одежу взяти и коня, а не знаєшь, ци пойдеш звѣдси у здоровлю без коня. Що кажешь, щось мя учинив княжатею, и сам єсь голый як бубен, а я теперь пѣв години од цѣсаря, а цѣсарь, его милость, из цѣсаревую сидить на столицѣ. Не з гаразду тебе бито, щось ледви из душею утѣк, та й ту не буде без того, абысь не був битый. Як ты ся смѣєшь звати цѣсарем? Бо то горлом важишь!“ И розказав слугам бити его мощно, а бивши казав его в темницю всадити и казав ему дати хлѣба и воды. И ту один слуга змиловався над ним, дав ему плахту прикрыти наготу его. А потѣм став мыслити князь, а то єм шаленого хлопа всадив у темницю; ему ся там стане щось злого и умре, то мѣй грѣх буде. Казав его выпустити и выгнати из замку. И рад був Йовиан, бѣдный цѣсарь в новѣй плахтѣ, сѣвши, ледво що жив. То его остро збито и плакав из такого нещастя своего. Мыслить собѣ, що має далѣ

---

\*) брама=ворота.

чинити, а потѣм сказав: пойдѣю просто до своего города, до своеѣ королевоѣ, чей мя познае и дѣточки мои. И вставши пошов

И пришовши до ворот городовых, став торкати, абы ему оговорено. Почувши то сторожа, сказала: — „Хто ты є и чого в ночи ходиш?“ А он им сказав: — „Я есм цѣсарь ваш Йовиан. Идѣть скоро до королевоѣ и скажѣть ѣй, нехай ми вышле сукнѣ, бо ем стратив из пригоды Сторожа видѣвши чоловѣка у плахтѣ, збитого, окровавленого, пошла у палату до короля и стануть говорити, кажучи: — „Найяснѣйшій цѣсарю, наш пане! Щось за хлоп у плахтѣ, збитый, кровавый стоит у брамѣ и послав нас до цѣсаревѣ, абы ему выслали сукнѣ; повѣдае, що є цѣсарем. Почувши, ангел, казав его привести перед себе, а коли Йовиан був на своѣм замку, тут ся пустив на него его пес коханий.“ Скочив на него, и коли бы слуги были не оборонили, то бы его був изѣв, бо его не пѣзнав. А коли вѣйшов до сѣней, тут сокол его, котрого сам на своѣй руцѣ носив, так ся его напудив, що урвався и став его крыльми и ногтями драти и бити в лицо его. Увойшов он и сѣв на паланок. А коли Йовиан увѣйшов був у палату, увидѣв, ангел сидит дуже препышно убраный, а при нѣм сидит цѣсарева, жена его власна. Видѣвши то Йовиан, задумався и мыслить собѣ: що то ся стало? Сказав до него ангел: — „Хто ты є и чого ту ходиш у ночи?“ Йовиан сказав: — „Я есм Йовиан, цѣсарь и моя то є столиця и панѣ. Сказав ангел до цѣсаревѣ: — „Повѣж моя наймилѣйша, котрый мы з межи нас двое пан есть?“ А она з гнѣвом сказала: — „Щось ты мене як дурня звѣдаеш? Чому з мене смѣх чиниш перед паньством? Уже то з тобою живу лѣт 18 и сынѣв маеме, а ты мя и ид кому ровняеш? Не чини из мене смѣху - Бог тя скаре! И заплакавши, сказала: яко живу, не знаю того шаленого! не знаю ци чоловѣк то, ци мара яка увѣйшла у палату нашу и хоче нас изюдити. „Потѣм ангел сказав до маршалка и до всѣх панѣв, котрѣ там при нѣм были и до слуг: — „Скажѣть ми правду, кому вы присягали, ци менѣ, ци тому дурному и шаленому хлопѣ?“ А паны и слуги сказали: — „О найяснѣйшій цѣсарю вельможный, пане наш милостивый! Мы твоѣй милости присягали тебе по Бозѣ до смерти за цѣсаря мати и наше здоровля за тебе покласти и при тобѣ стояти. А мы того шаленого, яко



живѣ не знаем, ци чоловікъ то єсть, ци мара. За тым каже ангел до Йовиана: — „Щож ты теперь гадаєш, шаленый хлопе? И казав покоевым бити нещасного и до коня, котрым всегда ѣздив, на котрѣм в той час був, коли шати изгубив, казав его за ноги привязати и по всему мѣсту волоčiti. И дуже его кѣнь побив и плахту на нѣм пѣдрав, волочивши его по всему мѣстѣ. И стали покоевѣ один другому говорити, кажучи: — „Не лишайме мы шаленого хлопа на дорозѣ пѣд ногами, але киньме его у гнѣй, нехай там з лихом лежить.“ И так покинувши его, лишили у гною. И ту бѣдный Йовиан лежачи, мыслив собѣ из плачем, кажучи: — „Що маю теперь чинити и до кого ся удати?“ Но, мыслив собѣ, пѣйду до пустельника, у котораго ся завше сповѣдав. И вставши пѣшов у тоту пуцу, де той пустельник жив

Коли прийшов пѣд келію, єще той пустельник не спав, Богу ся молив. Йовиан став торкати у вѣконце. Пустинник то почувши, здумѣвся, що бы то мало быти и хто ту в ночи ходит, бо нѣколи того не бывало. Потѣм и другій раз поторкало и стало говорити: — „Отче святой, отвори ми.“ А монах каже: — „Хто ты єси и чого ту в ночи ходиш?“ А цѣсарь бѣдный каже: — „Я єсм Йовиан цѣсарь, сын твоій духовный; маю до тебе пильну потребу.“ Сповѣдник почувши то, побѣг скоро до оконця, а коли оконце отворив, увидѣв страшного чоловіка у плахтѣ, кирвавого, збитого и не пѣзнавши его, скоро оконце затворив и став его проклинати: во имя Отца и Сына и Святого Духа, аминь; изгинь от мене злый, нечистый, душе проклятый; ѣдки прийшов искушати мене, оттут? Бѣдный Йовиан єще ся бѣльше зажури, що має чинити. Потѣм став из плачем говорити, кажучи: — „Отче святой! Змилуй ся надо мною; не єсм дух нечистый, але єсм цѣсарь, сын твоій духовный; отрѣкаюся сатанѣ и молюся Отцу и Сыну и Святому Духу; прошу тя, отче, если ми не имєш вѣры, то выслухай крѣзь стѣну сповѣди моєѣ, єще перших моих грѣхѣв, з котрых єм ся сповѣдав тобѣ єще перед тым и теперь ми ся погрѣша стало; и выслухай, що то ся надо мною стало, як Бог святой скарав мене за мою пыху и гордѣсть. Зле ми ся, отче святой, стало; змилуй ся для Христа небесного.“

Почувши то пустельник, казав єму сповѣдатися, а сам почав пильно слухати скрѣзь стѣну. Йовиан почав ся сповѣ-

дати от початку всѣхъ грѣхѣвъ своихъ и прийшло вже до того, як ся піднѣс в пыху великую против небесного Бога а як ся купаючи в поли, стратив одѣня свого коня и zostав голым а коли прийшов до дому, то его били; як и панѣ его не пѣзнала и панѣство все не пѣспало и пес и сокол не пѣзнав и конем го волочили по всему мѣсту и ледви живого лишили у гноу. Тогда уже бѣльше не мав я що чинити, до кого ся удати, крѣм тебе, отче мѣй святой, до своего сповѣдника. Згадай на милостивого, небесного, всемогущего Бога, котрый грѣшныхъ карае, а кающихъ ся знову приймае. Томуто и я каю ся того злого дѣла, пыхи диявольскоѣ и гордости проклятоѣ и плюю на диявола и на усѣ злиѣ дѣла его. Вѣрую Господу Богу и поклоняю ся Отцу и Сыну и Святому Духу, аминь.

Тогда чернець отворив оконце и сейчас его пѣзнав, що то быв власный цѣсарь, сын его духовный. Вставши скоро, отворив келию свою и увѣв его. А он увесь збитый и кровю сплынув. Видѣвши, умив его и оливою намастив тѣло его и дав на него сорочку и шаты свои и шапку и каже: — „Моли ся, пане мѣй, Богу.“ И сказав до него цѣсарь: — „Прошу тя, отче святой, ты ся моли Господу Богу и пресвятѣй Богородици. Тогда монахъ взявъ псалтырь, почав читати акафист пресвятоѣ Богородицѣ а цѣсарь стоить; и коли скѣнчив акафист, то есть похвалу Богу, ано почало свитати. И ту лягли припочити, бо и король змученый быв дуже и ту пустельникъ мало ся придрѣмавъ. И видѣвъ во снѣ: прийшла пресвятая Богородица изъ Михайломъ и кладуть на голову цѣсареву корону царскую и поясъ царскій и шаты и ланцюхъ золотый и вѣнецъ и скиптръ царскій. И збудивши ся, пустельникъ прославивъ Господа Бога и пресвятую Богородицу; избудивъ цѣсаря и став его пыгати и тѣшити и поздоровляти: — „Иди теперь, пане, просто до своеѣ столицѣ, вѣрую Богу и пресвятѣй Богородицѣ, що ты впѣзнають. Не бѣй ся, иди за Божимъ благословеніемъ, и благословивши его пустивъ.

Прийшовши Йовиян до брамы города своего, став теркати, абы ему отворено было. А ту ся и боить, абы его еще не били; дало му ся добре в памятку. Але крѣпляеть ся молитвами сповѣдника своего и укрѣпивъ ся Богомъ и пресвятою Богородицею.



Видѣвши его сторожа, скоро одчини́ла и по́знала, що то е́сть пан их. И убо́яли ся и мысли́ли собѣ́: а то пан наш ходив до своего сповѣ́дника, а мы не зна́еме, коли вѣ́н по́шов. Зара́з ему отвори́ли и поклони́ли ся и сказа́ли: — „О пане нашъ, отпусти́ нам, бо смо́ не знали и не зна́ем, коли твоя ми́лость вы́йшов. А ѿ́н на них махну́в рукою, абы́ мовчали; и весело́ на них и ласка́во посмотре́в и по́шов на двѣ́р. И там стоя́ло мно́го челя́ди и панства́ и ви́дѣвши, по́знали его́ зара́з и поклони́ли ся ему́ усѣ́ и так мысли́ли: що́ то́ ся чини́ть тут? На дво́рѣ цѣ́сарь и в пала́тѣ цѣ́сарь. Тут и пе́с его ко́ханий по́знав и став ся́ ему́ радова́ти и ла́щити, то́кмо не промови́ть; тако́ж и соко́л, по́знавши, его́ став весело́ квилѣ́ти. Ви́дѣвши то ма́ршанок, здумѣ́в ся́ дуже; став говори́ти панам, що́ ся чини́ть? У пала́тѣ цѣ́сарь и на дво́рѣ цѣ́сарь у мона́рховыхъ ша́тах. По́том панство́ ввѣ́йшло у пала́ту и поклони́ло ся а́нгелови. Ста́ли говори́ти, ка́жучи: — „На́йя́снѣ́йшій на́ш цѣ́сарю, пане ми́лый! що́ то́ ся чини́ть з на́ми? Твоя ми́лость тут си́дит на сто́лици из цѣ́саревой а́ на дво́рѣ стои́ть дру́гій цѣ́сарь, ко́троду́ ся всѣ́ по́кланяю́ть. Ска́зав а́нгел до ца́рицѣ́: — „Уста́ньме а́ выйде́м на двѣ́р, уви́дим, що́ то́ ся чини́ть. А коли́ вы́йшли на двѣ́р, цѣ́сарева́ зара́з по́знала пана́ своего́ и здумѣ́ла́ ся, не зна́е и са́ма, ко́троду́ то́ е́сть пра́вый му́ж е́ѣ з ме́жи них дво́х. Ска́зав а́нгел до па́но́в и до челя́ди: — „По́вѣ́жте ми́ пра́вду, ко́троду́ з ме́жи нас дво́х пан ва́ш.“ А па́ны и челя́дь сказа́ли: — „Оба́ есте́ одна́кѣ́, але́ на́м ся́ зда́е, що́ то́й пан на́ш, ко́троду́ при́йшов те́перь от своего́ сповѣ́дника; и то́ е́сть на́м дивно́, що́ вы́ есте́ оба́ одна́кѣ́.“ По́том а́нгел сказа́в до цѣ́саревой: — „Па́нѣ́, по́вѣ́ж ты́ пра́вду, ко́троду́ то́бѣ́ е́сть пан и му́ж из ме́жи нас дво́х и ко́троду́ ты́ шлю́била?“ А она́ посмотре́ла́ и на то́го, а по́том сказа́ла: — „Все́ ми́ ся́ зда́е, що́ то́й мо́й пан е́; але́ то́ ми́ дивно́, що́ есте́ оба́ одна́кѣ́. Бо́г зна́е, що́ то́ ся чини́ть. А по́том хло́пята́ вы́йшовши по́знали́ и уви́дѣвши́ Йо́вья́на отця́ своего́, при́бѣ́гли радо́стно́ и по́знали́ его́. То́гда а́нгел сказа́в: — „О́ то́ж па́н. тво́й, ко́троду́ те́перь при́йшов от сповѣ́дника́ своего́. Узя́вши то́гда а́нгел цѣ́сареву́ за ру́ку и цѣ́саря́ Йо́вья́на за дру́гу ру́ку, да́в ему́ жо́ну у ру́ку и став говори́ти: — „При́йми́ свою́ жо́ну и де́ѣти́ и сто́лицю́ цѣ́сарскую́, а не по́дно́си́ ся от то́го ча́су у пы́ху́ и не ро́вня́й ся́ Бо́гу небе́сному́, а то́

есть добре учинив, що покаяв ся и сам себе осудив; а до того еще еси до сповѣди ся удав и той грѣх одпокутовав еси сеѣ noci; и еще ти много помогла молитва того духовного, котрый ся молив до Господа Бога и Пресвятоѣ Богородицѣ. А я стерѣг столицѣ твоѣѣ и панѣ твоѣѣ и дѣток твоих; а тебе то Бог выдав быв на покаянiе. Протоже полѣпшай ся, бо я Ангел божiй хранитель твоѣй и сторож душѣ твоѣѣ. „Потѣм до панѣв: — „Ото естъ пан ваш, котрому есте присягали, того слухайте и вѣрно ему служѣть, бо я е Ангел божiй. А потѣм сказав: — Майте ся гаразд, Бог з вами И то сказавши, блиснув яко блискавица и невидимо было: поѣйшов в небо, а одѣня царске оставив посеред панства перед Йовияном И дав ся чути голос з высокости, кажучи: возьми, сыне, одѣня, котре я тобѣ у полѣ быв узав.

И ту Йовиян прославив Бога небесного и пресвятую Богородицу матер Божу. И став потѣм побожный и смирный и доконав в добрѣм покою живота своего в добрых учинках и справах.

---



## Повѣсть о розбѣйнику Флявіянѣ, котрый хотѣвъ розбити монастырь чернецій.

Быв один розбѣйник грѣшный, на имя Флявіян, котрый мав пѣд собою 100 розбѣйникѣвъ, смѣлых и збройных, що нѣхто на них не смѣвъ ударити. Одного дня зѣбравши собѣ пятьдесятъ товаришѣвъ, став им говорити, кажучи: — Мои милѣ друзѣ и товаришѣ. Умысливъ я себѣ нощи одну рѣчь пожиточну, еслибысьте на то пристали. А они ему сказали: — Пане наш, мы всегда тебе слушаем; що нам розкажеш, то мы готовѣ на твоѣй розказ. Сказав им Флявіян: — Бѣсть у пущи в лѣсѣ один богатый монастырь, в котрѣм то живутъ черницѣ, о котрѣм то и вы сами знаете. Тогда я уберу ся у одежу чернечу возму пѣд шаты меч свѣй и поѣду там сам. И они ми отворять сами ворота монастырскѣ и примуть в мѣсто черця мене за гостя, а вы в нощи там приѣдете и покличете мене, а я вам отворю и погубиме черницѣ и скарб их забереме, бо иначе не учиниме нѣчо, бо монастырь есть твердый.

Почувши то розбѣйники, похвалили раду его; а так Флявіян убравши ся по чернечому, узав пѣд ризы меч свѣй, поѣшов в пущу, де той монастырь и приѣшовши до монастыря, почав торкати у ворота монастырскѣ по обычаю монастырскому.

Почувши то старша игуменница, послала свою послушницу, хто то есть и чого ту приѣшов. Послушница видѣвши монаха, вернула ся и повѣла: — Госпоже! Якійсь монах стоитъ у воротах, хоче нашу святую обитель навидѣти и нас. Почувши то игуменница, покликкала сестры свои, поѣшли до ворот и сотворили молитву. А Флявіян сказав: — Аминь, мир вам преподобнѣ мои сестры! Спасайте ся во Господѣ. Приѣшов я до вас яко старецъ грѣшный навидѣти житя ваше, обители вашѣ святоѣ. Учувши то чернички радѣ были и сказали: —

Слава тобѣ христе Боже, що прислав нам святого отця. И будем от него благословенія просити и молитов святых.

А черницъ у тѣм монастыри было пятьдесятъ и три. Отворили ему ворота и пустили его з радостею и впадши, поклонили ся ему и просили до церкви. Поклони ся, отче, Богу! — И поклонив ся. А потѣм повели его до келіѣ и взявши в умивальницю воды, стали ему умивати ноги яко странному от пути, маючи его за преподобного отця; а он им подяковав.

А была в тѣм монастыри одна дѣвка, котра од многих лѣтъ была слѣпа, нѣма и глуха, для котроѣ то, привѣвши до него, просили благословенія. И взявши тоту воду, котрою Флявиянови мыли ноги, напоили тоту дѣвку и умыли еѣ. Зараз прозрѣла и промовила, и слышати стала и прославила небесного Бога. Видѣвши то черницѣ, припали до ногъ Флявиановых, поклонили ся ему. Стали его у ноги цѣловати, мовячи: — Бог тя послав нам, отче святой, негодным, грѣшным. Тота дѣвка от многих лѣтъ была слѣпа, нѣма и глуха, а днесь твоим приходом и за твоими святыми молитвами прозрѣла и говорить и чує.

Видѣвши то Флявиан, здумѣвся и познав ласку Божу над собою, що то Бог веде его на покаянє. И вставши сам, поклонив ся им и каже: — Слава тобѣ, Христе Боже, що хочеш всѣм спасти ся в розум истинный прийти. И винявши з подризы меч свѣй, показав им и каже: — Сестры наймилѣйшіѣ! Вашими святыми молитвами нехай и я многогрѣшный спасу ся. Вы мене маєте за святого отця, а я есм розбѣйникъ Флявиан, котрый має под собою 100 розбѣйникѣв. И сеѣ ночи вы всѣ мали погинути от того меча. Если ми не имете вѣры, увидите вы сами дружину мою, котра ту приїде и буде мя кликати, абы я им отворив. А приїде ихъ пятьдесятъ. Але вы не бѣйте ся: — Бог з вами! Нехай и я буду брат ваш и хочу бути до смерти монахом.


Почувши то черницѣ, здумѣли ся дуже. Прославили Господа Бога, що выбавив их од горкоѣ смерти. А коли настала нѣч и было о пѣвночи, приишли розбѣйники. 50 их стоить у воротахъ монастырскихъ и почали кликати: — Флявиане, старшино наша! Отвори нам, мы есме дружина твоя.



Почув и то Флявиян, пошов до ворѣт став им говорити: — Я вас не знаю. Маю я бѣльшу дружину, з котрею вас позабиваю, як злодѣѣв.

Розбѣйники почувши то, улякли ся и побѣгли на вѣтки. А черницѣ передержавши Флявияна в своѣм монастыри два дни, выправили его з честею до мужеського монастыря, в котрѣм постригши ся, многѣ лѣта перебував. А з того меча его чернички сковали хрест, в честь и во славу Христу Богу нашому.

---









## Видавництвом товариства „Просвѣта“ вийшли слѣдуючі книжки:

- |  |         |
|--|---------|
| Ч. 1. Что то „Просвѣта“. — Василя Пачовского . . . . .   | 1.— Кч  |
| Ч. 2. Чорт на вѣстлю. Оповѣданя из жита Верховинцѣв.<br>Лукача Демяна . . . . .                            | 3.— Кч  |
| Ч. 3. Выбор из поезій Стефана Руданьского . . . . .  | 3.— Кч  |
| Ч. 4—7. Исторія Подкарпатскоѣ Руси. ч. I. — В. Пачовского . . . . .  | 12.— Кч |
| Ч. 8. Чим и як гноити. — М. Творидла . . . . .   | 2.— Кч  |
| Ч. 9—10. Добродѣтель перевышаетъ богатство — народна<br>игра в 3 дѣйствіях — А. Духновича . . . . .        | 5.— Кч  |
| Ч. 11. Вертеп, рѣздвяна игра на три дѣѣ. — М. Подго-<br>рянки . . . . .                                    | 450 Кч  |
| Ч. 12 „За готар,“ оповѣданя из сельскаго жита. — Ольги<br>Кобылянской . . . . .                            | 2.— Кч  |
| Ч. 13 Чого нам вчитися од даньскихъ селян. — М. Творидла . . . . .   | 350 Кч  |
| Ч. 14 Пошестѣ хвороты на Подк. Руси, як их лѣчити и як<br>од них сокотити ся. — Др Ал. Манацкого . . . . . | 6 — Кч  |
| Ч. 15. В глухомъ кутѣ. — Б. Лепкого . . . . .  | 2.— Кч  |
| Ч. 16—10. Календарь на рѣн 1923 . . . . .  | 12.— Кч |
| Ч. 21. Старорусьскі оповѣданя . . . . .  | — Кч    |

### Оддѣл музыкальный:

- |   |         |
|---|---------|
| 1. Подкарпатскі спѣванки для хору — Першій десяток —<br>уложив О. Кізіма . . . . .              | 10.— Кч |
| 2 Гры и забавы для дѣтей для ужитку в захоронках и<br>школах — зложив. М. Рощаховскій . . . . . | 7.— Кч  |
| 3. Поезіи А. Духновича — упорядковав и пояснив Др Фр<br>Тихій . . . . .                         | 10.— Кч |

### Оддѣл литературно-науковий:

- |  |        |
|--|--------|
| 1. О письменномъ языкѣ Подкарпатскихъ Русинѣ. — А.<br>Волешина . . . . .       | 6 — Кч |
| 2. Литературні стремлѣня Подкарпатскихъ Русинѣ. — Д-ра Б.<br>Бирчака . . . . . |        |

### Печатаются:

- |   |
|---|
| 1. Исторія Подкарпатскихъ Русинѣ ч. II — В. Пачовского.           |
| 2. Выбор поезій — Т. Шевченка.                                    |
| 3. Христіанство на Руси.  |
| 4. Встеринарийный poradnik — Р. Матренчука.                       |
| 5. Читанка для народа.  |
| 6. Нультурно - господарскій стан Подкарпатскѣ Руси. — М. Творидла |

**Замовляти мож в канцелярії „Просвѣты“,  
Ужгород, Капитульна 10.**